

KUMPUAN
RAM LEH HNAM
HUMHALH

YMA

AW



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.24 10th June, 2012

YMA football, Vodafone Cup-ah Chanmari West pahnihna

Chanmari West, June 10 : Chanmari West branch YMA a din tirk atanga a vawi khat nan Central YMA buatsaiah branch hrang hrang football inelnaah final kan khel a, Ni 4.6.2012 khan lammualah a khawnawtin kan thawk chhuak a, Armed Veng nen champion nih inchuhin 3-1 in kan chak ta lo. A pumpuiah pahnihna kan ni a, lawmman trophy leh pawisa fai Rs 30000/- kan a, incheina leh ri thei chi hrang hrang nen kan tawiawm a, kan tum angin hlawhtlinna chang zo lo mah ila, veng mipuiten a tawp thlengin team an thlawp thatzia an lantir a ni.

He inkhelhah hian si hniih kan phurh hnuah kan branch striker H Lalnunzira'n a tauh lut a, kan veng team hian theihtawpin bei ngial mah se, si khat kan chhuah belh leh a, hnehna kan chang zo ta lo. Hetih lai hian Zirtea'n kan khelh apiangin goal a thun a, tournament chhunga goal 15 kan khung zinga goal kua a tilut.

Kan veng teamte tanpui tur hian veng mipui kan thawkchhuak tha hle

a, incheina leh ri thei chi hrang hrang nen kan tawiawm a, kan tum angin hlawhtlinna chang zo lo mah ila, veng mipuiten a tawp thlengin team an thlawp thatzia an lantir a ni.

YMA basketball-ah kan veng team-in consolation prize-ah no dozen 3 an dawng bawk. Tounament hi branch committee chuan thlir letin, kan dinthmunah lawmawm a ti a, player, coaching staff leh team tanpuitute bakah veng mipuite chungah lawmthu a sawi.

YMA Day atan Section-te inbuatsaiah

YMA Day kan lo thleng dawn ta, branch committee chuan branch huapin intawhkhawm a buatsaiah dawn lova, chutih laiin section lamah ropui taka hun hmang turin a ngen.

Section tin nasa takin an inbuatsaiah a, YMA day-ah hian branch committee chuan chhungkaw tin YMA flag zar theuh turin a beisei a, bawhzuiin section-ten flag an siam a, an zuar chhuak

mek bawk. Day pual hian section-in faina hnatlang an nei theuh dawn a, hei bakah hian an remchan angin an lawm ang. CH chuan park-ah hun hlimawm tak hman tumin an inbuatsaiah a, T pawhin indoor-ah he ni hi ropui taka hman an tum. K chuan hmunawl remchang an hmuhna hmunah hun hlimawm taka buatsaiah an tum a, V-in a remchan anga hman an tum bawk.

Branch committee a lawm

CYMA football leh basketball tournament kan khelh zo ta a, Pathian min hruaina nasa tak kan dawng a, football bikah phei chuan pahnihna dinthmun kan luah thei hial a ni. Hetiang kan thlen theihna kawngah hian player leh coaching staff inpekna leh

thawhrimna a ropui kan ti a, Veng chhung pawl hrang hrangin sum leh pai min pein min tawiawm a, veng mipui leh min tantuten sum leh tha nasa tak an seng a, heng zawng zawngah hian branch committee chuan lawmthu a sawi a ni.

YMA Day puala president Pu T. Ngurkhuma thuchah

Kum 2012 YMA Day chu kan lo thleng leh dawn ta; he hun lo thleng turah hian YMA member zawng zawng chibai ka bukin duhsakna ka hlan e.

YMA Day atang hian member-ten Kristian nundan tha a nung a, mi dang

tan inpekna thar leh Ram leh Hnam humhalh kawngah nasa lehzuala tan lain, hnam leh chi bil zawnga kal lo va, mizo nunze mawi chhawm nung thar zel turin ka ngen a che u. YMA dam reng rawh se, ka lawm e.

Branch News

Ni 8.6.2012 zan khan Tv Lalsawmzuala CH te inah branch executive an thu.

Ni 15.6.2012 a YMA day lo thleng tur chu section tinah a lawmna hman tur a ni a, YMA memberte mahni sectionah tel theuh turin kan innge.

Ni 16.6.2012-ah hian Zawlbulukh kuang duan hnatlang neih tur a ni a, section ten mistiri bungrua thawh chhuahpui tur a ni a, he huna kal tur hian branch executive member, section OB leh Thlanmual sub-committee memberte an ni.

Lammual a inkhelhenna ah khan Branch YMA Flag ken a ni a, lo hawn chuan Branch Secretary hnenah dahlut turin kan in ngen e.

Sairang road atanga Central road pen chhohna lai chu siamthat tuma hmalak mek a ni a, hna pawh tan thuai tum a ni.

Ni 5.6.2012-a leiminin a tihchhiat chhungte chu an tawrhpu a, heliai lung tla leh mai thei tur pahfai nan Rs 2500 pek a ni.

YMA buk, Vanapa run leh Pasaltha Neuva In LSC chu chhiah pek a ni.

Ni 14.6.2012 hi World Voluntary donors day a ni a, he hun hi Vanapa hall-ah thisen petute puala hun hman tur a ni a, kan veng atanga thisen petu zawng zawng leh Pu R. Lalnachhuana branch Vice president kal tur beisei an ni.

Thlanlung Granite ruk ching an awm a, hetiang tih chingte sim turin kan ngen a, hetiang tih tum kan hmuh chuan police hnenah thlen vat thin tur a ni.

TUN KAR CHANGVAWN
“ Lalpa chuan a han ban a, a ka a khawih a, Lalpa chuan ka hnenah, ‘Ngai rawh, i kaah ka thute ka dah ta’ a ti a.

Jeremia 1:9

Editorial Board

Editor:	J.Lalnangliana	9862399658
Joint Editor :	Lalchhandama	9862358347
News Editor :	Thangkhuma	9862303135
	R. Lalrinngetha	9862358337
	Jacob Lalrinsanga	9612319779
Cir.Manager :	Johny Lalthanpuia	9612359161
	EVL. Hruaitluanga	9862655426
Production Manager :	R.Lalhmachhuana	9436151817

Branch Office Bearer

President	T. Ngurkhuma	9436190843
Vice President	R. Lalhmachhuana	9436151817
Secretary	RL. Thanhnuna	9436152760
Asst. Secretary	Zairemmawia	9862385654
Treasurer	C. Lalzarliana	9436142049
Fin.Secretary	K. Darthantluanga	9436196071
Adviser-te :	Pu Lalbiakthanga Khiangte	
	Pu Rothuama, Pi Zamanthangi	
	Pu Lalrengpuia Sailo	

Editorial :

YMA huanga infiamma boruak lian ber kan zo ta, a tawp kan thlen dan duhthusam chiah lo mah se, a tha thawkhat e. A tha ber dinhmun hi pakhat tan zuahin a awm a, chu dinhmun chu chang phak chiah lo mah ila, kan lawm tho a, lawm thiam pawh angai hle.

Final zan kha chuan kan veng mi ngaihtuahna hmang deuh chu kan mutui viau lo a nih pawhin, a awm viau, kan tang tlang em a, champion ngei kan beiseina thlawn ta kha a uihawm em a ni. CYMA Tournament vawi tam lo khel tawh tan leh khelh beiseiawm tawh lo tan chuan a pawi zual a, final thlen harzia ngaihtuah phei chuan a pawi a ni.

Amaherawhchu kan dinhmun a chhe ta vek biak lem lova, kan naute tan phurna leh thiam pawl nihna dinhmun kan hnuchhiah a, an hmalam hun a eng a, dinhmun tha zawk pawh kan chuang kai ngei ang a, lammualah ngei sawn kan la chai ang.

YMA day kan lo thleng leh dawn ta, he hun hi hlim takin hmang ila, mi dangte tan malsawmna nih nan hmang ila, khawilaiah emaw lo thiat mah se, hetah chuan kan dinthar leh ang a, hnam thendarhtu ni lovin, phuarkhawmtuan kan tang ang a, mizo hnam lo par chhuahna tur a nih theih nan mizo thalaite hian theih tawp i chhuah thar ang u.

2012 Thuvawn

I awmdan tur chu LALPA chungah nghan la; Amah chu ring la, aman a ti vek ang.

Article : HMING ZIAHA I LEH A PAWIMAWHNA

Zova Tochhawng

Mizote hian kan lai ah hming tawpah mipa leh hmeichhe nihna(gender) tihlang theituh A kan dah thin a. Khawvela hnam heti zozai zingah pawh hetianga mipa leh hmeichhe hriat hranna hmang awm chhun kan ni hial awm e. Hnam dangte erawh chu an hming sak dan phung hre sa late tan chuan hmeichhe hming leh mipa hming a hriat hran theih ngai loh a ni.

Mizote chuan kan ran vulh, ui, zawhte, vawk, bawng te chenin an hming kan phuahsak a nih chuan Sena, Dumi, Rangi titen I leh A telh kan bang chuang lo va. Mihring hming pawh a phelin sawi mah ila, a tawpa I/A kan telh thin avang hian a chiang em em tho thin. Hming tawpa I/A kan dah hian mipa leh hmeichhia kan hriat hran theihna mai piah lamah pawimawhna tak kawng thum a nei a. Chungte chu a mal te tein i lo chhui thuak thuak teh ang.

(1) I/A sang chhum hmaka kan lam rik hian, eng thil emaw neitu(owner) an ni tih a kawk thin a. Entir nan, "Buanga ui ka hmu" tiha A hi sang chhum hmaka kan lam chuan, ui chu Buanga ta a ni tih a kawk nghal a. A hi kan thluk hniam erawh chuan ui, a hming Buanga ka hmu tih a kawk hlaugh thung.

"Russia-a kan zin tum khan Leo Tolstoy in kan tlawh a." tia ziah ni ta se, Leo Tolstoy a hming lo hre sa late chuan Leo Tolstoy In chu eng In nge tih reng an hre dawn lo va. Mihring in a nih ring teh reng pawh ni se, hmeichhia nge mipa tihah an la buai tho vang. Chuvangin, hnam dang hmingah pawh mipa leh hmeichhia hriat hran theih nan I leh A belh ve ngei chi a ni a. Tin, eng thil emaw neitu an ni tih a fiah nghal nan, 'Leo Tolstoy-a in' tih ngei tur a ni.

(2). I/A sang chhum hmaka lam rik hian a titu(doer) nihna a kawk tel thei bawk a ni. Entir nan, "Liana sah hliam a ni" tiha A hi sang chhum hata kan lam chuan, Liana'n mihring/ran a sat hliam tihna a ni a. Liana tiha A hi thluk hniam a nih erawh chuan amah Liana chu an sat hliam tihna a ni daih thung. Sport column-ah, "Beckham ball pek, Ronaldo thun kha a la mawi ber mai" tih ni ta se, Beckham leh Ronaldo te hre sate tan pawh Mizo bengah chuan a chhumbung riau va, a la hre ve late tan lek phei chuan thlasik mumang ang ruai a ni ngei ang. "Beckham-a ball pek, Ronaldo-a thun kha.." tih a nih erawh chuan mipa an ni thu te, ball petu leh a pet goal-tu te a chiang nghal kuar a, bengah a lut mam zat mai bawk a ni.

Hetiang hian hminga I leh A telh loh hian hriatna zau lo deuhte tan buai theihna a awm phah theih bakah awmze hrang a neih daih theih thin avangin hnam dang hming kan sawi leh kan ziah chang pawhin kan

sawi tak anga a neitu an nihna te, a titu an nihna te leh an inhlun zawm dan te a chian zawk theih nan mathei lova I leh A ziah lan ngei hi a tha a ni. A changkang lova ngaih ngawt chi pawh a ni lo.

TV, radio, ni tin chanchinbu, magazine, leh veng chhung YMA chanchinbu-ahte hnam dang mi larte chanchin leh thiltih an ziah leh an puan changin an hminga I/A telh belh chuang si lova an hming tawpa tel sa I/A ring nghalin, 'Hemamalini'n Hawng' tih te, 'Brian Lara'n Pakistan Hneh Beisei' tih te, 'Barak Obama'n Nobel Peace Prize Dawng' tih te a ni thin a. Hemamalini-in, Brian Lara-an, Barak Obama-an tia ziah/puan hi kan lo hman \hin dan kumkhua a nih bakah a chiang ber bawk. Tin, TV chanchin tharah mipa emaw, hmeichhia emaw sawi nan (thluk hniam)-in' tihfai vek ching an awm thin a. -In tih hi hmeichhia leh mipa hminga kan belh thin in/ an tih nen a hawrawp a inzah chiah tho va. Chuvangin, 'Larsap Lakhera-an' tih emaw, 'Sonia-in' emaw tih hi a tluka chiang a awm chuang lo va ni. Tin, an hminga I/A telh ve ngai lo Zo hnathlak unaute hming kan sawi leh kan ziah chang pawhin, 'J.Vialua-an, Ruotmawi-i, S.Ngodei-in tih mai hi hmeichhia/mipa, a titu leh a neitu an nihuate tichiangu a nih avangin a fuh zawk foin bengah a lut a mam zat nge nge \hin a ni.

Khawvel hmun tinah mi hming \hate hming chawia eng thil emaw hming phuah hi an ching vek hlawn a. Eiffel Tower, Kennedy Space Center, Walt Disney Land te an ti a. Amaherawhchu, an hming vuahte ta nia ngaih theih turin apostrophe S (e.g. Eiffel's Tower) an telh ngai hauh lo thung. Zoram chhungah ngei pawh mihring hming chawia phuah Peter Street, Mary Joan School, Johnson College tihte pawh an hming chawite ta anga lang theiin an hmang ngai bik lo. A neitu leh a dintute hming chawia phuah a nih erawh chuan, Zohmingi's Boutique, Aunty's Kitchen, Veiyw's Beauty Concept titein ('s telhin) an ziak ve mai \hin.

Zabanga High School, Hrangbana College, Saikuti Hall tahahte pawh hian mahni kutkawih liau liauva thil dintuten anmahni hming chawia an phuah anga I leh A te kan telh thin avangin a kawh a dang daihin a dik phek linaah zawm...

TAITESENA

• An member Tv Lalchhuanawma'n a boralsan chu an uiin, khawhar chhungte an tuarpui hle.
 • Ni 15.6.2012 (Zirtawpni) dar 11:00 hian Indoor Stadium-ah YMA Day hlimawm taka hman tur a ni a, member-te kal theuh turin an innge. YMA Day lawmnaah hian intihsiakna hlimawm tak tak leh lawmman siam tura ni a, ei leh in tuihai tak buatsaih a ni ang. an a
 • Faina chungchanga Circular an siam chu chhungtinte ngai pawimawh a, tan la zual sauh sauh turin an innge.
 • 17th Inter Branch YMA Football Tournament a Chanmari West Branch YMA-in lawmman 2-na a la thei chu an lawm hle. Player-te leh veng mipuite chungah lawmthu an sawi.

CHAWNGBAWLA

• Kum 2012 YMA Day hlimawm taka hman tum a ni a, zing karah Faina Hnatlang YMA Chhang member-te nen neih a ni ang a. Chhun 11:00 ah YMA Park-ah Programme hlimawm tak tak hman a ni ang. YMA member leh YMA Chhang member-te kim taka kal turin an inchah, ei tur tuihai tak buatsaih a ni ang.
 • Section Project-atan a hmasa berah Ni 21.6.2012 (Ningani) hian High School Field-ah mipa leh hmeichhia tan Football Tournament khelh tur a ni a. Hetah hian section chu Group-4 ah then a ni a, member-te lo in buatsaih turin an inhriattir. Heti ang hian Group then a ni:
 Group-1- Section hravuitute
 Group-2-Bial 1, 2 leh 4
 Group-3-Bial 5, 6 leh 9
 Group-4-Bial 3,7 leh 8.

YMA Day-ah Group colour tur pawh a ni ang.
 • Pu R. Lalhmingthanga in bul tuikhur a inbual, insu leh bike sil thinte kha phal loh a nih avangin tun chinah chuan ti tawh lo turu hriattir in ni e.
 • Section hnatlanna atana in phal taka hmantirtu leh ei tur tuihai tak hlui thintu Pi Lalrintluangi (RTS) te chhungkaw chungah leh taima taka hnatlanga thawk chhuak thinte chungah lawmthu an sawi.
 • Chhingtinte YMA Day-a tar tur YMA Flag lei theuh turin an innge a, tunkar chhungan an rawn zuar dawn a, pakhat Rs 20 man tur a ni ang.
 • Pu R. Thansanga (L) te chhungkuain section hnenah Tea Urn (20 lit) an pe a, an lawm hle.

VANAPA

• Ni 7.6.2012 (Ninga) zan khan Leader- inah committee an nei.
 • Ni 8.6.2012 (Zirtawp) zan khan YMA Flag thuin hnatlang an nei a, Puanthui khawl leh dawr hmantirtu Pu H. Vanlalvena te chhungkaw chungah an lawm hle.
 • Ni 9.6.2012 (Inrinni) khan nilengin section huam chhungah hnatlang an nei. Hnatlang tanpuina petute chungah an lawm hle. Tanpuina petute:
 1 Pu L. Romawia - Rs 200
 2 Pu H. Lalchungnunga - Rs 200
 3 Pi Rosiami - Balu (Tin 4)
 4 Pu Laltanpuia (TPA) - Cement
 5 HD Zorinpua - Rawra
 6 Local Council-Cement (Bag 1) leh balu (tin 8)
 7 Pi Lungtiawii - Thingpui min lumsak OB In charge Tv Zairemmawia'n nilengin hnatlang a tawiawm a, an lawm hle.

• An Section Assistant Secretary atan Tv Zothankima (Atea) thlan thar a ni. Pu R. Ramlawma leh Pu C. Vanlalsanga te Committee member atan ruat thar an ni bawk.
 • YMA Day lo thleng turah zingkar ah Section-ah Faina hnatlang neih tur a ni a, Member-te leh YMA Chhang te bakah Nu leh Pa, a thei apiangte hnatlang turin an insawm. In tinah YMA Flag Rs 20/- in zawrh a ni dawn a, lo lei sak a, lo tar theuh turin chhungtinte an ngen.

• Pi Rualchhani damlo in lamah an inenkawl mek a. Pu C.Lalnunmawia Aizawl Hospital-ah a awm mek bawk.

• An Section chhunga lung lumin Pi Vanlalmuani in a delh chhiat siamthat hnatlang Local Council kaihruainain Section YMA nen neih a ni a, Bialtu MLA Pu Lalhazara'n Rs 5,000/- Er R.Lalthazuala Rs 500/- Pu Lalchhandama Ralte Rs 1,000/- Pu H.Lalchungnunga (Machunga) Rs 500/- Pu Lalbiakthanga Khiangte (SP) Chini, Pu Lalzirliana Chini, Pi Zamveli Rs 300/- Pu C.Lalnunmawia Rs 500/- leh midang dang ten hnatlang leh chhiat tawk te tanpuina an pe a, an chungah an lawm takzet.
 • Ni 7.6.2012 (Ningani) nileng khan Property sub Committee-te'n an Section information mike chhe siamin hnatlang an nei a, an chungah Section in lawmthu a sawi.

• An Section hravuitu, YMA Chhang incharge Tv David Vanlalpeka chu Synod Choir-a a bass sa turin ruat a ni a, an chhuang an lawmpui hle.

NEUVA

• Ni 5.6.2012 leh 6.6.2012 zan khan khan Flag siam a hnatlang neih a ni.
 • Hriselna Bu Stamp leh Address bel hnatlang neih thin ani a, Section inhlawhna hmuhsaktu Pu Lalremruata chungah lawmthu an sawi.
 • Section Picnic neih tum ani a, kal tumte chuan Secretary hnenah Ni 17.6.2012 hma a Buhfai no 2 leh Rs. 50/- keng a in report tur a ni.
 • Kar leh hun remchangah Flag zuar a hnatlang neih tum a ni a, member a tam thei ang ber hnatlang turin an in ngen.
 • Vodafone Cup Inter Branch YMA Football Tournament neih zawh takah kan Branch YMA Team te Pahnihna an ni chu an lawm a, Branch aiawh a khel thei Tv. Robert Zoramthara leh Tv. R.Zoramthara te chu an chhuang hle.
 • Section hravuitu leh member hnatlang a thawkchhuak thin te chungah lawmthu an sawi a, Branch leh Section activity hrang hrnagah tan la leh zual turin an in ngen a ni.

KHUANGCHERA

• Ni 5.6.2012 (Thawhleh) zan khan Committee neih a ni a. Thu pawimawh tak tak rel a ni.
 • Ninga zan leh Zirtawp zanah YMA Flag siam hnatlang nei a ni a. Hravuitu te hnatlang an kal tha chu an lawm hle.
 • YMA Day-ah hian zing kar hnatlang neih tur a ni a. YMA Member leh YMA Chhang zawng zawng te hnatlang theuh turin an inhriattir. Tin, Chhun lamah Infiamna chi hrang hrang hmanga function hlimawm tak YMA Member leh YMA Chhangte tan neih a ni dawn. Sawhchiar tuihai tak siam tum a ni a. YMA member leh YMA Chhang zawng zawng te ngai pawimawha tel vek turin an inhriattir bawk.
 • YMA Day-ah Branch-in In tinah YMA Flag zar tur a tih angin Section huamchhungah YMA Flag cheng 20/- in an zuar dawn a. Chhungkaw tinte ngai pawimawha lo leisak vek turin an innge.
 • An hravuitu Pu H.V. Lalthavela hna thila Manipur-a zin chu YMA Day hmang hmana dam taka a rawn haw hman an beisei.
 • Vodafone Cup Inter Branch YMA Football Tournament neih zawh takah CW Branch YMA Team te'n Runner's Up an ni thei chu an lawmpui hle a. Hetiang team ropuia tel thei an member Lalrinchhana(C), Lalremruata, Lalnunpuia leh an hravuitu Zion Lalramluaha leh Asstt. Coach Lalliansanga te chu an chhuang tak zet a ni.

YMA tournament-a sum hmu leh hman

Hmu hna

1. YMA member thawh	-Rs 24980
2. Pawl hrang thawh	- Rs 8500
3. Mimal thawh khawm	- Rs 47100
4. Branch Exe. thawh	- Rs 7800
5. Pahnihna lawmman	- Rs 30000
Total	- Rs 1,18,380
Sum hman zawng zawng	- Rs 74,255
Balance	- Rs 44,125

YMA team tana mimal sum thawtute

Pu Lalrammauria Khiangte, K	Rs 2000
Pu Zothangzuala Chhangte, K	Rs 500
Pu Lalhriatpuia (Mamatea)	
Dawrpui vengthar	Rs 500
Pu Lalhriata Colney, CH	Rs 800
Pu Benjaminia, CH	Rs 500
Pu Lalthanruma, N	Rs 300
Pi Zamanthangi, K	Rs 2000
Er. Lalhmachhuana, Zemabawk	Rs 2000

Mimal thahneungaita tanpuina :
 Pu Lalsawia - Ui pum khat; Pu V Lianzinga CH - final-a hman turin motor; Pi Zamanthangi, Adviser 'K' - Silpuoline 2; JO JO Restaurant - Soup tui tak; Local Council - Silpouline 3; Pu Lalrengpua Adviser CH leh VL Thakima (Leader V) - Inkhel video in la.

LAWMTHU

Ni 5.6.2012 (Thawlehni) zing kara kan in lunglumin a delh chungchangah Bialtu MLA, Local Council, YMA leh Vengchhung/ vengpawn mipui min tawrhpu a tanpuina min petute leh tha leh zung seng a min hnatlanpuitute zawng zawng chungah lawmthu kan sawi tak meuh a, Chanmari West Veng nih a thlamuan thlak kan ti takzet a ni.

In khawngaihna dawngtu, Vanlalmuani te chhung, V-Section

HRIATTIRNA

UPC (Miz) Biak In kawmchhaka motor dah thin te'n motor leh kea kalte harsatna a thlen nasat avangin helai hmunah hian motor park thin te, park tawh lo turin branch YMA chuan a ngen a, kawng dung hmun cheplaia motor dah thin te pawh fimkhur lehzual turin an inchah.

In hmun duh tan

Chanmari West Khuangchera section-ah In (Assam type) sak sa, hralh phal a ni, a man chu inbiak remna a ni ang.
 Contact : Ph. 9862054897

Local Council

Ni 5.6.2012 (Thawleh) zing khan Chaltlang kham atanga lung lumin Pu Runa mual a awm, Pi Vanlalmuani In, Pu Lalbiakmawia In leh Pu Lalnumawia in te a deng chhia a, vanneihtlhak takin mihring thi leh hliam an awm lo. Lung lumin in a den chhia te, Local Council, YMA Vanapa Section leh mi tlawnagaite'n hnatlangin an siam tha. Hnatlangte thingpui lumnan mi inphalte hnen atangin hengte hi kan dawng a, an chungah lawmthu kan sawi tak meuh meuh a ni.

Pu Lal thanzara (Bialtu MLA) - Rs 5000
 Pu Lalchhandama Ralte - Rs 1000
 Pu H. Lalchungnunga - Rs 500
 Pu R. Lalthazuala (MCS) - Rs 500
 Pi Remsangpui (Retailer-II) - Chini 10kg

PEM CHHUAK

- Pu K.Lalremmawia te chhungkua Pi Lianzothangi 'V' te in luah chu Lunglei-ah an pem
- Pi Mary Lalruatkimi te chhungkua 'CH' Section te chu Tuirial-ah an pem.

PEM LUT

- Lalramnunsiamate unau chu Cheural atangin K-132-ah an rawn pem
- Pu Malsawmzualate nupa chu Aizawl Venglai atangin Pi Remzovi 'K' Section-ah.
- Pu Lalmuanpuate chhungkua chu Vaivakawn atangin Pu Lalbiakkhuang Sailo 'K' Section-ah.
- Pu Vanlallianate chhungkua chu Sialhawk atangin Pu Lalrinliana 'K' Section-ah.
- Lalnunmawia a unau chu Rullam atangin Pu Lalrinliana 'K' Section-ah.
- Pu Zoliankunga te chhungkua chu Thuampui atangin Pu Kawlzika 'T' Section-ah.

phek thumna zawmna...

hlel that thin. Pu Hrangbana khan college din nan sum leh pai \hahnen tak a seng ngei a, ama ta bil erawh a ni hauh si lo. Chuvangin, khawvelin a chin dan angin a neitu nihna tilang kher lovin, Zabang High School, Hrangban College, Saikut Hall tih mai pawh ni se, an hming chawia phuah a nih tu'n ka hai hauh chuang lo vang a, sawisel bovin a dik chiah bawk ang. Lawngtlaia Dokulh Hall te pawh saw, amah Dokulh-a hmingah A a tel loh avangin A telh loh hi a dik dan chu a ni hrim hrim a. Dokulha Hall tia kan sawi talh thin pawh hi kan ngaihtuah chian loh vanga kan tihsual a ni.

Lianmawi Tailoring, Sang Sang Travel, Mosia Store tih angah te, JL Cinema, LV Arts, 3J Offset tih angte hi chu a neitu hming ni kher lovin tu hming emaw chawia phuah a ni thei a. Chuvangin, a dik chiah tho va. Hauva Building, Hrangbana Workshop, Ropui Tailoring tih tea I/A telh a ni hi chu a dintute ngeiin anmahni hming an chawina a nih avangin a dik chiah bawk a ni.

Sawi tak anga hming tawpa I/A kan telh hian awmze hrang hrang a neih theih \hin avang hian a hman danah pawh kan fimkhur thiam a pawimawh hle a. Zo hnathlhak unaute hming leh hnam hrang hrangte hming an sawi leh ziah chang pawhin Mathaia, Petera, Mari, Sari tia I/A kan ziah zawm anga ziah zawm kher lovin Mizote benga a luh mam zawk nan leh a awmzia a dik zawk theih nan I/A emaw, In/An emaw te hi hyphen nena hman kawp zel a pawimawh tak zet a ni.

FRIDGE AND WASHING MACHINE REPAIRING WORK

Hunthar peng bulah engtik lai pawhin pan leh koh theih reng kan ni e. Kim Kim Fridge and Washing machine repairing Work.

Prop : TC. LALTHANGLIANA
 (2-2) Ph : 9612194396



AR Lammualah kan veng football team tawimawmtute'n pahnihna trophy an lawm